

Kayëta ir Filemonj in Lilaya in

Akayëta aŋo Pol ŷëgwën këreceŋ ir baŋo Filemonj. Ar Xadëp irexëm ir bano wãcënd Onesim, naŵa baŋo. Ga fed këni gë Pol wël ko end Yesu Kërisët eŋ, wã ko do hi ko mëŋ bëte këreceŋ. Ata Pol fel këŋo exo maŷi gër axwën arexëm Filemonj. ŷëgw kayëta ijo ro eŋo karaxën Filemonj eŋo kaca gë eteban Onesim. Gayikwa angwën aŋo, xadëp ir naŵak in, asoron bano soronënd, bandëmar alaŵ baŋo lawënd. Er sëyali ko Pol gër kayëta aŋo ro in ex ebalër ed bëreŵak end Kërisët el, aŷap ŷapëk ex canayand gër banëkëra bandebën. Mëŋ ex Pol axara baŋo Filemonj eŋo kaca Onesim gë obal gayikako anëka hi baxo arëŵak end Kërisët ang mëŋ ak. Er ex gër akayëta in:

Ecëmar el do gë ecalen ed Filemonj el: 1-3.

End Onesim eŋ: 4-22.

Ofelar ol do gë cale ipelatar in: 23-25.

Ecëmar el

¹ Wëno Pol, ar fëra këno në end Yesu Kërisët an, wëno gë abaŷe Timote ki ŷëgwënëlinde wëj Filemonj. Wëno mbaŋ ke balënd endey eŋ, wëj ar bar këne andiyen amat an.

² Gër kayëta ijo ro, aŷar bar këmun wëj gë Apiya, imaŷe itoxari indebi in, gë Arëŷip ar xel këmi hi enga endemat an, do gë bër gër Amara and hik gër iciŵ indey bën.

³ Faba irebi Kaxanu do gë Axwën Yesu Kërisët, yëlëlenun oyekax ol do gë obetak ol.

End aņana aņ do gë ekwëta ed Filemonj eņ

⁴ Din këmi xwitand mi calen do këmo šëkwand Kaxanu ir xwën ke.

⁵ Awëlati wëlati këme mëne wëj mbaņ xwëta këyo Axwën Yesu, bëte mbaņ ki balënd end dek okëreceņ ocandax eņ.

⁶ Ga ßar këne ako ekwëta edebat, anang nang këy dek er yek eyëbo din në end Kërisët in. Awa masinëlëbo ngwa.

⁷ Wëno mbaņ nëngandëra ke do mbaņ xemën ke aņana andey aņ. Abaņe Filemonj, enimin okëreceņ odanjëm yema këbi owëkw oņ në endey.

End emëka ed Pol eņ

⁸ Mëņ ex, ga yël ke Kërisët or gapak ol, anëyali anëyali domi er yäpëk ey di in, ßari ame di na.

⁹ Er yapan ke mi kara mo kara ga nang këme ako gë aņana hi këy. Wëno Pol, anëka xar këme bëte waca ke hi këme gër epëra në end Yesu Kërisët.

¹⁰ Axara këmi xarand end Onesim eņ*. Asëñiwën iram hi ko elod yatir wã ko end Kërisët eņ ro gër epëra.

¹¹ Bakey ßand xucak ßaņ, ofëcak abaxi rin na. Barikan gëregako, arin këbo rin wëj gë wëno.

¹² Anëka felëli këmo exo maỹili ado ga lëker këmi mbaņ.

* **1:10 1.10** Onesim ijo xadëp hi bax. Anaũa nauũa baņo Filemonj, ar xwën baņo an, hër ko đup gër angol and fëra bano Pol.

13 Dek ŷandi baxe exo ŷayi gër ndam ro, exe dëcarand ang do ye rëcara wëj ak ang hi këme gër epëra në end Atëfëtan ak.

14 Bari gematak axe ñandi bana me di xarak axe wëlër exe na pere këdi këmi nëŷali eye din oyekax olo.

15 Bamat imëd fo ŷapër ban gë Onesim enun ketaxën din.

16 Barikan gërëgako nëmëc xadëp hi ko. Imaŷe ind ki ŷal mbaŷ hi ko, axo bo ex na xadëp fo. Wëno gë pit ke ŷalënd endexëm eŷ xarak wëj doxi ŷalënd nëmëc gayik xadëp irey exo. Bëte arey hi ko ga ŷar kën ako gër Axwën Yesu.

17 Awa angëmëne wëj gë wëno abar ŷar ke, kwëtayalo Onesim ang xwëtayadoye wëno ak.

18 Angëmëne aŷenan wënan ki, wëno këye wëkad, do angëmëne ŷeŷ ŷomëxa ki na, wëno ki wäŷënëd.

19 Ata wëno Pol kë ŷëgwëlinde gë ataxan andam aŷ dëŷ: wëno aŷäŷën këmi wäŷën. Wëj aniyan andey aŷ dëŷ ga ŷomëxa këye wa, ŷari ami pel na.

20 Eyo abaŷe, dëcale mondako në end Kërisët, yemënël emëkw edam el ga ŷar ke ako gër ndexëm.

21 Anang nang këme mëne aŷa këy wä er këmi ŷëgwënelinde gër kayëta ijo ro in. Aye fëni ke mëne nëmëc er xara këmi in këy ri.

22 Gërëgako këñënanëxëye bëte aciŷ, yëla këme mëne asebët këne sëbëtëli gayik Kaxanu ayakali këŷun yakali cale indewën in.

²³ Epafëras, imaÿe ind fëra kënëbo në erebat në end Yesu Kërisët in, asëma këñun şëmand.

²⁴ Asëma kënun şëmand bête bër bar këmi andiyen bën: Marëk, gë Arisëtarëk, gë Demas do gë Luk.

²⁵ Oyekax or Axwën Yesu Kërisët ol gil ex gër onden ondwën!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 29 Apr 2025 from source
files dated 29 Apr 2025

8b7902f3-5e35-5b89-86b2-c6da1be458b9